

### LI PTITE WACHLÈTE (3)

A sès kinze ans, l'pus vîye dèss princesses a polu griper djusk'au waches dèl grande basse. Rivneuwe à s' maujone èle a raconté dèss masses d' afêres, mins l' pus ayèssant, dijéve-t-èle, c'èst d' si stinde dsus on banc d' sauwlon bèn paujêre dzos l'clér di lune èt d' voye d' au lon lès lumères dèl vile riglati come dèss cintinnes di stwèles, d' ôre lès muzikes dèss brûts, l' grondmint dèss autos èt lès vwès dèss djins, di voye totès lès toûrs dèss èglîjes èt leûs clotchîs, èt d' ètinde bomer leûs clokes; c'ki l' disbauchéve li pus, c'èstéve bèn sûr di n' polu î d'aler.



Î ! come li pus djonne dèss soûs èstéve bauyaude à l' xhoûter; adon, l' anûti arivé, astokêye à s' fènièsse doviète bèn au laudje èle s' a rimètu à riwêti è l' êr, au triviès dèl bleuwe sombe euwe èt d'sayî di s' ripsisinter l'grande vile avou tos sès brûts èt sès ûlmints, minme k'i lî shonéve oyi l' bomâdje dèss clokes dischinde djusk'a lèye.

L'anêye k'a shûvu, c'èst l' deuzyinme dèss soûs k'a polu monter è nawî là èwousse k' èle li voléve. Èle s'a rtruvé au djoû tot djusse au momint ki l' solia s'coûtchéve èt s' dire ki s'èstéve là l'pus bia dèss spèctakes. Tot l' cîr shènéve ièsse dauboré d' aur, a-t-

èle conté, èt lès nuwâdjès don, èle ni poléve trover dèss mots po lès discrîre ! Rodjes èt violassés, i nèviyîne pa-padzeu lèye, mins, bèn pus rwèds k'zèls, ène pèkêye di blancs clérs moxhons lès avîne trèvautchîs come ène blanke vwèle èt passer à l' rèze dèss waches èwouski l' solia s'racrapotéve; èle s'avéve mètu à nawî di c'costé là mins l' i s' avéve si bèn racayuté au lon ki, d'on côp, i gn'avéve pus pont d' lumère dsus l' basse èt dins lès nuwâdjès.

L' anêye d'après, ça z-a sfî l' toû dèl trwèzyinme d' polu monter la-wôt. Di tètotes, s'èstéve li pus franche. Èle s'a



mètu à nawî èt rdjonde on laudje fleuve ki vinéve si machî dins l'grande basse. Èle a véyu dèss rians vètes tiènes avou dèss vignôbes, dèss tchèstias èt dèss cinses au mitan di bèlès forêts; èle a oyu lès vîdius èt lès tchîpèlmints dèss

moxhons. L'solia tapéve si fwârt k'èle duvéve si rplonker è l' euwe po dischandi s'vizâdje tot brûlant. Dilé l' rivâdje, one binde d' èfants, tot dismoussîs, èstîne à djouwer èt pèstèler dins l' euwe. A l' vîre vinu à zèls, di peû i z-ont pètè èvoye! Adon one bièsse s'a dauré tot bawant come nèn possible. S' èstéve on tchén, mins èle n'avéve mauy vèyu d' tchén si bèn k'èle s'a råde mètu lon èri à iute. Èle èstéve shûre di todi s' rimimbrier lès bèlès forêts, lès vèts tiènes èt lès bias ptits èfants, minme s'i n'avîne pont d' keuwe di pèxhon. come lèye.

(A shûre ?)

\*\*\*\*\*

**On comache todi...**